

## A g'rode Furi

Im sechz'ga-- Jahr , 's muiss scho spot im August g'wes'n see, hob i g'seg'n wia da Rudl hintaus Traktor und Pflui zum Häum'reiß'n g'richt't hot. Noch'n Aant muiss ma d'Häum' meglichst schnö reiß'n, dass is Unkraut unta d'Erd' kimmt und da Bod'n net gonz austrickat.

I bi grad dazuikemma, wia da Rudl in Pflui on d'Hydraulik vom Traktor onmontiert hot. De Hydraulik wor domois gonz wos Neichs. Si hot in Pflui beim Ockan automatisch oweloss'n und a wieda aufg'hob'm. I hob' no nia g'seg'n g'hobt, wia des funktioniert. „Loss mit mitfohr'n!“ hob i zum Rudl g'sogt und wor a scho om Traktor obm. A Viert'lstund' späta wor ma im Reitföd und da Rudl is om Ocka ee'bog'n, steh'blieb'm, hot in Hydraulikgriff longsom vire'druckt und da Pflui is oweg'fohr'n bis auf d'Erd. Donn is a virsichti ong'fohr'n, de zwoa Pfuieis'n hob'n in Ocka gonz seicht eeneg'schnitt'n und de Streichble' hob'm' d'Schreib'm um'draht. Des hot gonz oafoch ausg'schaut. Om G'wendt hot da Rudl in Pflui mit da Hydraulik ausg'hob'm, is quer iwa'n Ocka umeg'fohrn, hot in Pflui wieda oweloss'n und d'Häum in de onare Richtung g'riss'n. Des hot ma narrisch g'foin.

No da zweit'n Runde sogt da Rudl auf oamoi „latzt du!“, is steh'bieb'm und aus'n Sitz auf d'Seit'n g'rutscht. Z'erscht hob'i g'stutzt, donn begriffa. I derf oackan! Longsom bi i losg'fohr'n. Da Bod'n hinta mir hot si, wia's g'hert um'draht. Hie und do hot ma da Rudl ins Lenkrad'l greifa miass'n, dass i sche, grad weidafohr. Om G'wendt moat da Rudl: "Des ko'st sch gonz guit. I bi eh miad!". Steigt o und legt si unta'n Nussbam.

latzt hob'm Traktor und Pflui wirkli mir g'hert. Gonz g'nau hob i auf d'Furi vireg'schaut, dass i jo net aus da Spur kimm. Noch'n G'wedt beim Z'ruckfohr'n hob i's scho a Wengl lockara g'nomma. Oft hob i mi noch'n Pflui um'draht, hob ana Schwoim no'g'schaut oda vom Kirito 'tramt. Daweu hot da Traktor g'mocht, wos a wö'n hot: Gleis is a rechts o'bog'n, wo eh scho g'ockat wor, gleis is a ma links davo und hat oan, zwoa Meta Häum steh' loss'n. Wia i wieda beim Nussbam wor, is da Rudl auf'g'stand'n und hot si mee Leistung ong'schaut.

„Du host jo lauta Bär'n eeneg'ockat. Wonn'st net vire schaut bringst dee Lewido koa g'rodeFuri z'somm!“ hot a g'murrt und hot mi no a Runde ockan loss'n. Owa i bi hoit net und net g'rod kemma. So hot da Rudl wieda söwa ockan miass'n und mee londwirtschaftliche Karrier' wor z'End. Scho om next'n To is da Rudl mit meen Bruida ausg'fohr'n. Und der hot's vü bessa g'mocht.

*August 2019*